

菩薩善戒經

第十

二百四
賢十

48806



元祿九年丙子二月日重修

皇圖策固 帝階綴昌

佛日增輝 懋譽輪常轉

山城州天安寺法金剛院置

法華經

菩薩善戒經卷第十

宋剎賓三藏法師求那跋摩等譯

優波離問菩薩受戒法

菩薩摩訶薩成就戒成就善戒成就利益衆
生戒先當具足學優婆塞戒沙彌戒比丘戒
若言不具優婆塞戒得沙彌戒者無有是處
不具沙彌戒得比丘戒者亦無是處不具如
是三種戒者得菩薩戒亦無是處譬如重樓
四級次第不由初級至二級者無有是處不
由二級至於三級不由三級至四級者亦無
是處菩薩具足三種戒已欲受菩薩戒應當
至心以無貪著捨於一切內外之物若不能

捨不具三戒終不能得菩薩戒也。爾時受者
自觀己身如觀智者。爾時於寂靜處。禮十方
佛。東向像前。右膝著地。合掌而言。大德十方
佛。菩薩僧聽。今我某甲求菩薩戒。我已具優
婆塞戒。乃至具智者事。是故我從十方佛菩
薩僧求菩薩戒。今十方佛菩薩僧觀我心。我
若有不信心。毀菩提心。有惡心。虛誑心。莫施
我戒。若其無者。當施我戒。憐愍故。第二第三
亦如是。至心默然。任專念已。而作是言。今已
施我菩薩戒。我已得菩薩戒。何以故。十方佛
菩薩以他心智。觀我心。我有真實心。當知已
施我戒。憐愍故。今我無師。十方佛菩薩為師。

第二第三亦尔尔時十方佛菩薩即作相示
當知得戒

十方佛菩薩告諸大衆彼世界有某甲真實
受菩薩戒我今已施憐愍故今此人無師我
爲作師我今護念是我法弟即起禮十方佛
菩薩是爲自羯磨若有智者以憍慢故不從
受者不得菩薩戒若是破戒者若智者不在遠
方若國土亂若自重病若爲利益多人若更
無受處出家在家若能捨能施深心立願求
阿耨多羅三藐三菩提尔時若有同菩提心
同法同意能說能教善知義者欲受戒人應
往其所頭面作禮偏袒右肩右膝著地合掌

而言大德諦聽我今從大德乞受菩薩戒大自在戒無上戒無勝戒大德於我不重心者爲憐愍故乞施我戒若彼大德默然聽者即應還起更整衣服向十方三世諸佛世尊及住大地諸菩薩等頭面作禮隨己智力讚歎諸佛及諸菩薩所有功德專念三寶在佛像前長跪合掌作如是言大德我今某甲乞受菩薩戒大德今當爲憐愍故施菩薩戒若彼大德默然聽者受者今時應當至心專念三寶生歡喜心復作是念我已得成就無量無邊無上功德寶藏當得菩薩所受持戒復應一心默然而住今時智者語受者言善男子

諦聽法弟菩薩汝今真實是菩薩不真實發
於菩提心不受者答言大德實是智者復言
汝今具足三種戒不答言具足又問能捨內
外所有物不答言能捨又問惜身財不答言
不惜又問汝能從我受一切菩薩戒攝持一
切菩提道戒利益一切諸衆生戒是戒如十
方三世諸佛菩薩戒汝能持不答言能第二
第三亦如是尔時智者應唱是言十方諸佛
及諸菩薩大德僧聽今某甲求我從十方佛
菩薩僧乞受菩薩戒已具三戒發菩提心真
實菩薩能捨一切內外所有不惜身命願十
方諸佛菩薩僧憐愍故施某甲菩薩戒憐愍

故施無量無邊無上功德寶藏戒為利益衆
生故增長諸佛菩薩法故第二第三亦如是
尔時諸方有涼風起智者當知十方諸佛諸
菩薩僧施是人戒已語受者言某甲諦聽十
方諸佛諸菩薩僧今施汝戒如一切三世菩
薩戒汝當至心持能持不荅言能第二第三
亦如是尔時智者敬礼十方諸佛諸菩薩僧
及礼佛像礼已復唱是言十方諸佛菩薩大
德聽今某甲三說時已從十方諸佛及菩薩僧
得菩薩戒說者我是受者某是我為某甲證
人大師者謂十方無量諸佛菩薩僧是小師
者我身是也師有二種一可見二不可見不

可見者十方諸佛菩薩僧是可見者我身是
於可見不可見師邊是人得戒竟第二第三
亦如是如是羯磨竟羯磨竟二俱默然念時
十方世界諸佛及諸菩薩知是相已告諸大
衆彼世界中有如是人從彼智者受菩薩戒
如是人者是我法弟我今至心憐愍護念以
十方佛諸菩薩僧憐愍護念故授者受者俱
增善法默然小住已便起敬礼十方諸佛諸
菩薩僧是名菩薩受菩薩戒已一切戒無止
戒無邊戒功德聚戒寂靜戒淨心戒破一切
衆生煩惱戒如是戒者勝於十方一切聲聞
辟支佛戒何以故度脫一切諸衆生故菩薩

受菩薩戒已應當學讀菩薩法藏菩薩摩夷
菩薩欲受菩薩戒時先當觀察若不信者不
應從受慳者貪者不知足者破戒汙戒不敬
重戒喜貪瞋者無忍辱者不能爲他遮罪咎
者懈怠嬾惰貪受世樂樂說世事乃至不能
一念之頃念於三寶疑網癡闇不能讀誦善

薩法藏菩薩摩夷及生誹謗如是之人不應
從受既受戒已不應向彼不信者說乃至不
向謗大乘者說何以故若不信者以是因緣
墮地獄故是故菩薩不應向說若說得罪菩
薩定知向彼說能破使人惡口惡業及不信
心說則無罪菩薩既受菩薩戒已師應爲說

犯非犯法若知至心能受不為供養故受不
為效他故受不為憍慢故受今時是師便應
為說犯非犯法某甲諦聽菩薩戒者有八重
法四重如先菩薩若為貪利養故自讚其身
得菩薩戒住菩薩地是名菩薩第五重法若
有貧窮受苦惱者及以病人來從乞索菩薩
貪惜不施乃至一錢之物有求法者恣惜不
施乃至一偈是名菩薩第六重法
菩薩若瞋不應加惡若以手打或杖或石惡
聲罵辱或時無力不能打罵心懷瞋忿若為
他人之所打罵前人求悔不受其懺故懷瞋
恨增長不息心不淨者是名菩薩第七重法

菩薩若有同師同學誹謗菩薩方等法藏受
學頂戴相似非法者不應共住若定知已不
得向人讚歎其德是名菩薩第八重法
菩薩有二種一者在家二者出家在家六重
出家八重是八重法菩薩若犯一一重法若
具足犯現在不能莊嚴無量無上菩提現在
不能令心寂靜是則名為名字菩薩非義菩
薩是名菩薩梅陀羅也不名沙門非婆羅門
不能正向阿耨多羅三藐三菩提菩薩心有
三種下中上若後四重下中心犯不名為犯
若以上心惡心犯者是名為犯上者所謂樂
作如是四事心無慚愧不知懺悔不見犯身

讚破戒者是名上惡心犯菩薩雖犯如是四
重終不失於菩薩戒也如比丘犯四重失波
羅提木义戒菩薩若犯比丘四重亦失波羅
提木义戒汗菩薩戒汗者現在不能莊嚴菩
提不得無量福德三昧是名爲汗有二因緣
失菩薩戒一者退菩提心二者得上惡心離
是二緣乃至他世地獄畜生餓鬼之中終不
失於菩薩戒也菩薩戒者不同波羅提木义
戒菩薩若於後世更受菩薩戒時不名新得
名爲開示瑩淨今當更說受菩薩戒是犯非
犯輕重之相上中下異

菩薩若受菩薩戒已若於晝夜塔像經卷讀

誦之人千万菩薩不以華香供養禮拜不能
讚歎心不歡喜乃至一念是名犯重不名八
重是名菩薩汙心疑心有瘡墮落起不淨心
若有所作無恭敬心不信故懈怠故是名犯
重不名八重若無念心是名犯輕不犯者若
有淨心常求菩提淨心者如須陀洹所有四信
菩薩若不知足不少欲貪著利養是名犯重
不名八重不犯者若能定知以不知足能調
衆生
菩薩若見上座宿德同學同師生憍慢心及
以惡心不起承迎禮拜設坐不共語言先意
問訊若問所疑不爲解說是名犯重不名八

重是名菩薩。心疑心有瘡。墮落不起不淨。有所作不犯者。若病若眠。若亂心時。若至心聽法。供養佛時。寫經讀誦。解說論義。共先客語。不說者。心知不與語。能令調伏。防僧制。故護多人故。

若比丘為求罪過。聽菩薩戒。不信受者。不信

教者。及不成就。優婆塞戒。不成就。沙彌戒。不成就。波羅提木叉戒者。不得聽菩薩戒。聽者得罪。若比丘犯波夜提罪。不慚愧。不生悔。聽菩薩戒者。得偷羅遮罪。若比丘犯偷羅遮罪。不慚愧。不生悔。聽菩薩戒者。得僧伽婆尸沙罪。若比丘犯僧伽婆尸沙罪。不慚愧。不生悔。

聽菩薩戒者得波羅夷罪謂第八重若有說者得僧伽婆尸沙是故經中作如是言不信者不應聽不信者不應說

有篤信檀越來請菩薩若自舍若塔寺若村落若國土供給所須衣服飲食卧具醫藥菩薩憍慢瞋恨輕賤不往受者得罪是罪因煩惱犯若菩薩無伴獨行至白衣家得錯謬罪若到白衣舍不能說法開示教化令其供養佛法僧寶是名犯重不名八重不犯者若病若闇鈍若狂若遠請若道路恐難知不受請令彼調伏若先受請若勤修善法時若未聞義爲欲聞故若知請主心不真實若受彼請恐多

人瞋若僧制

若有檀越以金銀真珠車渠馬瑙琉璃頗梨
奴婢車乘象馬等物雜色敷具奉施菩薩菩
薩應受若不受者得罪是罪因煩惱犯不犯
者若狂若知受已必生貪著若知受已施主
生悔若知施主施已發狂若知受已施主貧
窮若知是物是三寶許若知是物是劫奪得
若知受已多得苦惱所謂王難賊盜死亡閉
繫惡聲流布擯令出境若知受已不能捨用
修種福德於良福田

若有衆生爲解義故欲得聞法往菩薩所諮
啓未聞菩薩輕心慢心不爲說者得罪是罪

因煩惱犯不犯者若知前人是惡邪見求覓
過罪若病若病始差若狂若知不說令彼調
伏若佛未制若知前人於三寶所不生敬重
若舉動麤踈若知鈍根聞深義已生於邪見
若忍邪見若知聞已轉向惡人宣說其事破
壞正法

若有惡人能作殺害及梅陀羅菩薩若不親
近往返爲說正法者得罪何以故菩薩若見
持戒精進身口意淨不生慈悲若見惡人能
生慈悲是故菩薩若不爲說則得犯罪不犯
者若狂若王制若僧制若慮多人嫌若知不
說令彼調伏

若有檀越非親里若長者若婆羅門以種種
衣奉施菩薩菩薩應受若菩薩自求多得亦
應受之如衣鉢亦如是如衣鉢經亦如是菩
薩若到檀越邊求索縷經使非親里織師織
教令緻織務令廣厚我不自著汝與檀越俱
亦有福若檀越言我爲師故唯願自著菩薩
得已若自爲身往織師所教令緻織務使廣
厚若得衣已自著者犯重不名八重若不教
者不犯一十

菩薩若受菩薩戒已應受應畜憍奢耶敷具
至百千万數金銀亦不聲聞之人但爲自利
是故如來不聽受畜菩薩不爲利衆生是

故聽畜不得。不受若爲知足名譽。故不受者。得失意罪。墮落不起。有所有疑不淨。

若菩薩以懈怠因緣不能利益諸衆生者。得罪。是罪因煩惱犯。

若菩薩爲人所讚言。是十住。若阿羅漢至須。隨洎少欲知足。默然受者。得罪。是罪因煩惱犯。

若菩薩入僧中時。見有諸人非法戲笑。不呵責者。得罪。不犯者。若聽法時爲調伏。故爲隨心說法。故爲能利益。故。

若言菩薩不樂涅槃。亦非不樂。不畏煩惱。亦非不畏。何以故。流轉生死。故若菩薩作是言。得罪。何以故。菩薩樂於涅槃。聲聞緣覺所不。

能知聲聞緣覺所樂涅槃於菩薩樂百分千
分百千万分乃至無有一分菩薩呵責畏於
煩惱聲聞緣覺所不能知聲聞緣覺呵責畏
於煩惱於菩薩呵責畏於煩惱百分千分百
千万分乃至無有一分何以故聲聞緣覺但
爲自利不能利他菩薩不介自利利他故菩
薩雖行有漏故勝羅漢終日處漏煩惱不汗
是故得罪

若菩薩不畏惡聲不護惡聲得失意罪若他
無惡橫稱他惡者得犯惡罪是罪因煩惱犯
若爲調伏加之惡語者得失意罪非是惡罪
不犯者若呵外道詐來現受菩薩戒者若心

本無惡口出惡言若顛狂者若知呵責有大
利益若知瞋彼彼得利益若為護戒不生瞋
者得罪若知瞋彼彼得現少利無他世大利
若菩薩打者報打罵者報罵惱者報惱得失
意罪是罪因煩惱犯

若有菩薩共相譏呵若實不實菩薩即應謙
下歸謝若不能者得罪不受歸謝是亦得罪
以放逸故不歸謝者得罪以放逸故不受歸
謝者得罪不犯者若知彼人由來弊惡常來
求人短若知不受令彼破惡
若菩薩於他瞋恨常生念言我若見時當打
當罵不休不息不能自調者犯罪

若菩薩與比丘尼共同一道行不犯若有貪心得罪不犯者為調伏故二十

若菩薩從非親里尼受食不犯何以故菩薩摩訶薩發菩提心已於諸衆生無非親里

若菩薩為貪作使多畜弟子犯罪不犯者若為調伏若為護法若為利益若無貪心

若菩薩懈怠懶惰不勤精進樂眠卧者得罪不犯者若病若病差氣力未足時若遠行時若讀誦疲乏時若思惟對治時

若菩薩共談世事無益之言得罪不犯者若他問說若隨他心為調伏故說時至心莫作增減若菩薩憍慢心故不諮問師不受師教得罪

不犯者若病若狂若癡若大聰明多聞有智
為調衆生若入定時

若菩薩欲心起時不觀對治疾調滅者犯罪
不犯者雖觀對治煩惱力盛不能令滅若故
自試發欲心時

若菩薩言不應受聲聞戒不應讀聲聞經何
以故聲聞經律不能利益諸衆生故若作是
言犯重不名八重不犯者為貪著小乘經律者
若菩薩不讀不誦菩薩法藏一向讀誦聲聞
經律得罪不犯者若不聞知有菩薩藏

若菩薩不讀不誦如來正經讀誦世典文頌
書疏者得罪不犯者若為論義破於邪見若

二分佛經一分外書何以故爲知外典是虛
妄法佛法真實故爲知世事故不爲世人所
輕慢故

若菩薩聞菩薩藏聲聞藏有不可思議事不
信不受言非佛說若自謗若是他謗得罪若
菩薩作是言我智力羸弱肉眼不淨不見如

來甚深境界如來境界佛眼所見唯佛能知
一切法界非我所及若能如是思惟觀者是
名實行菩薩忍與不忍二俱不犯 三十

若菩薩生瞋慢心自言持戒多聞智慧悉勝
汝者得罪是罪因煩惱犯不犯者若爲破邪
見爲破輕慢於佛法者若爲伏彼自大心故

爲未信者生信心故已生信者得增長故若
菩薩聞說法處乃至一由旬不往聽者得罪
若輕說者不往得罪是罪因煩惱犯若懈怠
不往者得失意罪不犯者若不覺不知不聞
若病若病初差氣力未足若知說者顛倒不
正法慮說者生羞愧心若說一法更無異義
若修善法若化衆生若不解彼說若不能憶念
若菩薩輕說法者不生恭敬不讚其德嗤笑
所說辭義不正者得罪

菩薩若受菩薩戒已衆生所作事務不與同
者得罪所謂去來入出擁護財物和合鬪諍
作諸善事戒施多聞不共同者得罪不犯者

若病若不知作若自營大事若先許助他若
自修善法若慮多人瞋若喜若癡若狂若知
不同能調伏彼若僧制

菩薩若輕說法之人罵辱打擲嗤笑所說但
依文辭不依義者得罪是罪因煩惱犯菩薩
若受菩薩戒已不能隨從衆生心者得罪所
謂行住坐卧修諸善事

菩薩若受菩薩戒已見病苦人不能瞻養作
給使者得罪不犯者若自病若無事力應廣
勸化有事力者若彼病者多有宗親若自急
修無上善法若先瞻他病若根闇鈍如病貧
窮困苦亦復如是

菩薩若受菩薩戒已見惡衆生修行惡法不能教呵勸勉之者得失意罪不犯者若知是人善有善知識能教呵責若知爲說不隨其語若倒解語若有害心
菩薩若受菩薩戒已所畜之物與白衣同者
得失意罪

菩薩若受菩薩戒已不應以金銀盃器受取飲食所畜銅器不得同彼白衣木器角器悉不聽用用者得罪不犯者若失本器若行路請時若重病 四十

菩薩若受菩薩戒已受恩不念得罪是罪因
煩惱犯

菩薩若受菩薩戒已受他恩惠不能報者得
罪報者應當持戒精進坐禪讀誦經典隨施
主心所喜之事而以報之不犯者施主不受
菩薩若受菩薩戒已見有苦人若死失物王
賊水火親屬離別應往其所說法慰喻隨其
所須任力給施若不能者犯罪不犯者若不
得自在若自重病若不受語若有疑難若王
瞋彼人若僧制

菩薩若受菩薩戒已若畜弟子不能從諸篤
信檀越求索所須衣食卧具醫藥房舍隨時
供給又不隨時說法教化者得罪不犯者若
知弟子有大勢力聰明福德多諸檀越若是

外道詐來盜法若知不能增長佛法

菩薩若受菩薩戒已應常讚嘆他人善事若
隱他德者得罪是罪因煩惱犯不犯者若前
人遮若辭鈍不知若重病若慮他嫌若難了
知如菴羅菓等

菩薩若受菩薩戒已所坐牀榻過八指者得
罪不犯者若說法時若受篤信檀越請時若
至外道祠中坐時

菩薩若受菩薩戒已若弟子中應瞋不應
呵不應罰不罰應擯不擯得罪是罪因煩
惱犯不應瞋而瞋不應呵而呵不應罰而罰
不應擯而擯得罪不犯者若知弟子能燒塔

寺作大惡事或殺師和尚若同師同和尚若
父母若待時若定了知以是因緣破壞衆僧
若知後時自生慚愧

菩薩若受菩薩戒已獲大神足見可怖者而
不怖之可生信者不令生信得罪不犯者若
知一切信邪倒見不信佛法

菩薩若受菩薩戒已常至心念不作犯想如
其犯已尋應向人發露懺悔所謂大小乘人
能善解義善宣說者是名菩薩一切戒從菩
薩初地解六波羅蜜至一切戒一切悉是菩
薩禁戒是名一切戒如來先於聲聞經中所
未說者今於菩薩藏摩夷中說何故名爲一

切戒摠說出家在家戒故是名一切戒難戒者有三種一者菩薩有大自然自在財富無量悉能捨離受菩薩戒是名難戒二者菩薩急難之時猶不令戒有微瑕折況復毀破是名爲難戒三者菩薩雖隨衆生行住坐卧常堅持戒不令毀犯是名難戒一切自戒者有四種一者受二者性三者修四者方便受者謂三羯磨性者謂與性共俱菩薩摩訶薩性柔軟故身口意業常善修者於無量佛諸菩薩所修方便者如諸菩薩以四攝法攝取衆生教令修集身口意善是名一切自戒善人戒者有五種一者自持禁戒二者教他令持三者

讚戒四者見樂持者歡喜讚嘆五者有犯隨
悔心無休息是名善人戒一切行戒者有十
三種一者發願迴向涅槃二者廣大三者清
淨四者歡喜五者不破六者不牽七者堅固
八者瓔珞九者真實十者義十一者信十二
者寶十三者常如聲聞地聲聞禁戒一切善
法悉是阿耨多羅三藐三菩提因是名一切
行戒除戒者有八種菩薩常應作如是念如
我不喜死一切衆生亦復如是是故不應殺
害物命如我不喜劫盜貪婬惡口妄語兩舌
無義語杖石打罵等一切衆生亦復如是是
故不應劫盜貪婬惡口妄語兩舌無義語杖

石打罵是名除戒菩薩乃至喪失身命終不
毀壞如是八戒自利利他戒者菩薩於戒遮
處則遮開處則開若遮處不遮開處不開者
得罪菩薩知一切衆生可攝則攝可捨則捨
身口淨戒常共檀波羅蜜行乃至共般若波
羅蜜行如是淨戒自利利他是名自利利他
戒寂靜戒者從初受戒至心堅持爲四沙門
果爲菩提果不爲身命是名寂靜戒菩薩坐
時見王長者起者得罪若先跏趺見王長者
跪者得罪若先衣不整見王長者檢容整服
者得罪若王長者說惡語時隨意稱讚者得
罪不疑之處強生疑者得罪應疑之處不生

疑者得罪菩薩戒者初夜後夜不得眠卧善願善行善法具足堪任中用正命成就遠離斷常具行中道離五欲樂無上無勝遠離邪見不破不壞是名寂靜戒菩薩戒聚成就具足無量妙果以是戒聚因緣故具足尸波羅蜜受者雖未得阿耨多羅三藐三菩提已得具足五事功德一者常為諸佛菩薩所念二者受常淨樂三者臨死無恨四者捨身得生諸佛世界五者莊嚴阿耨多羅三藐三菩提受持菩薩戒者不自為身唯為利他及莊嚴阿耨多羅三藐三菩提是菩薩戒悉是過去未來現在恒河沙等諸佛菩薩之所成就乃

至十方諸佛菩薩亦復如是

菩薩善戒經卷第十

賢

效他

上胡

教反 瑩淨

上定

反 紆縷

延

字

線

反 緻

織

上利

反 直

弊

惡

上祭

反 輕

下田

加

反 結

下莫

反 蚩笑

上正

作

嗤

反

祠

中

上詞

音

瑕

上反

下

田

隔

反

